

明万历十五年准四氏学疏。礼部题：『为巡历事竣，敬陈补偏救弊之略，以备采择事。』该山东巡按御史毛在题：前事奉圣旨：『该部知道，饮此。』抄出到部送司，案呈到部，除议各道之分任九款，系隶各衙门掌行。所据事关典制内一款贤裔之均收，相应酌议开列，上请圣裁定夺，恭候勅下，臣等遵奉施行，一开贤裔之均收。前件臣等议得，国家设立三氏学，优崇圣贤后裔，亦以胥教诲而育才俊也。但止及孔、颜、孟，而不曾子者，缘曾氏子孙流寓江西。至嘉靖年间，奉旨世袭翰林院五经博士，始复还山东，依守坟庙。今虽子孙微弱，尚未蕃衍，但均系先

贤之后，教养作兴，委不可独缺。既经巡按御史毛在条陈，应咨吏部并知会都察院，转行巡按御史提学道及各衙门。以后曾氏子孙果读书向方堪以作养者，俱许送入该学。其考选应试廪、增、起贡，悉照三氏例施行。至於遇有朝廷大典礼，与孔、颜、孟子孙一体行取赴京观礼。庶圣恩普照，贤裔均沾，其於崇儒重道之典，益复益光。伏乞圣裁。

奉旨是。